

Gbouŋ nba ki Pɔɔl din sɔb ki tur GALASIA TEEB nae na

Ki jiin Galasia teeb gbouŋ na po

Baa din piin ki mɔɔntir barŋanii nba jiin Yiisa po ki teen binba ki tee Juu teeb, ki bi teen yada na, buboit nae din baar, a li kpaa talase ki nirɔ n sak wei Moses sennu nawa ki fit teen Yiisaweirɔ nan mɔnii amii. Pɔɔl din wann nan linba na kaa kpaa talasi, a linba kpaa talas ki jiin manfoor nba nyi Yiisa ni na tee nirɔ n teen Yiisa yadae, a ŋanne saa te ki nisaarik tee kasii Yennu boor.

¹⁻² Min Pɔɔl nba tee Masia toonii, nan ti naa waas nba be nna na kur foont Masiaweira nba be Galasia tiŋ ni. Nisaarik kaa teenin Masia toonii, nisaarii kaa bia tumin, ŋaan ti Baa Yennu nan Yiisa Masia nba ki u din fiinɔ kuun ni nae gannin.

³ Ti Baa Yennu nan ti Yomdaano Yiisa Masia ninkpabaun nan parmaasir-ii be nani.

⁴ Yiisa Masia-e din sak ti Baa Yennu loomm ki kpo ti biit paak a wun fatit tingbouŋ na biit daabisin ni. ⁵ Nɔɔ Yennu kɔɔe yen dontir mɔkmɔk nan mɔkmɔk. Mamɔmm.

Barŋanii yennkɔɔe be

⁶ Li bakitime nan yaa gaar labagann na yيامa, ŋaan nyik Yennu nba yiini Masia ninbatinu paak na. ⁷ Nisiab be ki yiab a bin lebit Masia barŋanii na ki ŋmat i dudukit; ŋaan barmɔniie, barŋansiar ji kaa. ⁸ Li-i lekii tee Yendouŋ ni malaka koo timmie mɔɔnt barŋansiar, ki li be

li kuukoo, ki ki tee taa ponj din moont linba turi na, mopor-ii be li yoo paak. ⁹ Ti ponj din betiewa, naan n bia nammit beerie motana: nisoo-i moont labaar ki turi, ki li ki tee linba ki i din gaar na, mopor-ii be u paak.

¹⁰ N ki yiab maa n gaar nisaarik paku kaa, naan Yennu yare ki n loon, kimaan mi-i loon nisaarik pakuie, n bo kii tee Masia daabiri.

Bianjinba ki Pooł teen Masia toonii

¹¹ N naa waas, n yaa n tiari nan barnanii nba ki n moontir teeni na ki tee nisaarik nba din pak linba na kaa. ¹² Nisaarik kaa din wannin ki n gaar, naan Yiisa Masia monj monje din fiit wannin.

¹³ I ponj gbat maa din tuun bianjinba, yoo nba ki n din waa Juu teeb Yenjiantu na, nan n din tuu mukisir Yiisaweira bonchiann, ki yiab maa n biirib ki gbenn. ¹⁴ Timm Juu teeb jiantu sonu ni, mine din gar toonn ti waakir ni, kimaan n din jii n par kura ki waa ti yeejamm kaar nba want linbae.

¹⁵ Naan Yennu ninbatinu paak, ki u din gannin ki bi daa ki marimi, ki yiinin a man tun u toona.

¹⁶ Ki waa din dukin ki nyinn u Bik man paanu ni ki wannin a n moont u barnanii ki tur binba ki tee Juu teeb yoo nba, n din ki saan nisaarik boor ki faa soo baanni. ¹⁷ N bia din ki saan Jerusalem ki saa la binba teen toomiinba n liik na, naan n din fiire li taakpaak ni ki saan Arabia tij ni; li poorpoe ki n nmat saan Damaskus doo ni. ¹⁸ Ki bina nantaa poorpowa ki n tan saan Jerusalem ki fount Piita, ki biar u boor daa piik nan nanjmu

kuukoo. ¹⁹ Li-i jikii kii tee ti Yomdaano Yiisa naa bik Jeems-i kaa, n din ki la toomiinba na soo.

²⁰ Yennu moŋ mi nan maa sob linba na tee barmoniie, ki faak kaa lenji.

²¹ Li poorpoe ki n din saan Siria nan Silisia yentnba ni, ²² ŋaan li yoo na Masiaweira nba be Judea yent ni na din ki mimi. ²³ Baa din mi linba tee bi leeb nba din yeen a “Joo nba tuu mukisirit na mun ji dia barnanii nba ki u din yaa wun biir nae ki moontir teen niib.” ²⁴ Ton, ki bi ji din piak Yennu n paak.

2

Pool nan toomiinba leeb labaar

¹ Ton, li bina piik nan ŋanna poorpoe ki min nan Banabas, ki pukin Taitus, din ŋmat saan Jerusalem. ² Yennu-e din fiit li sonu saanu ki wannin, li paake ki n saan. Leŋe ki n yiin saakab na, ti kuukoo, ki wannib maa moontir barnanii maŋ bianinba ki teen binba ki tee Juu teeb na, kimaan n ki loon maa tun linba, nan maa saa tun linba na n tan biar yanni. ³ Ton, n toknanloo Taitus maŋ tee Griik nirœ, ŋaan soo din ki miau a wun pot u punni. ⁴ Binba be ki fa faak bi moŋ paak a bi mun tee Masiaweira na ŋarin din loon ki Taitus n tun nnae. Li niib din woo ti sinsuuk ni, a bin bann taa mok yent-n-moŋ nba Yiisa Masia ni na. Bi loon tii tee Moses sennu na daabae, ⁵ ŋaan taa mun loon tin dia barnanii nan li barmonii sonu ki turi na paak, ki ti ki sakib nan waaminawa.

⁶ Naan binba ki bi yib saakab na, (baa tee nijaana koo baa ki tee, li ki kpaa talas min

yaa boor, kimaan Yennu ki bikii nan ningannii;) ḡamm nba ki bi yib saakab na din ki turin kpaanpaanii. ⁷ Ḥaan baa set la linba n boor tee Yennu nba gannin a n mōont u barḡanii ki tur binba ki tee Juu teeb, nan bianḡinba ki u din gann Piita a wun mōont li barḡanii ki tur Juu teeb nae. ⁸ Kimaan Yennu paḡ paak, Piita nba din tee toonii ki tur Juu teeb bianḡinba na, nnae ki n mun tee toonii ki tur binba ki tee Juu teeb. ⁹ Jeems nan Piita nan Joōnn mōḡ nba ki bi yib saakab na, ḡaan bi mōḡ din bann nan Yennu-e turin toonganḡir na; li paak min nan Banabas nan ḡamm din foont leeb ki yokin leeb nii ni, ḡanne din want nan ti kura mōk mōtaauk nan leeb. Timm nan ḡamm din sake a min nan Banabas-ii mōontir barḡanii kii teen binba ki tee Juu teeb na, ki bii mun-ii mōontir kii teen Juu teeb. ¹⁰ Linba na kuukōe ki bi din betit: a ti daa tammit talasdamm nba be bi sinsuuk ni na po. Li mune ki n set poḡ loon tumu.

Pōol nba yakii nan Piita bianḡinba

¹¹ Ḥanne ki n tan yakii nan Piita, waa din be Antiok yoo nba na, kimaan u din mōk biit. ¹² Jeems din tun Juu tesiab Antiok doo ni. Baa din daa ki baar yoo nba na, Piita nan binba ki tee Juu teeb na din lakii di, ḡaan baa tan baar yoo nba, ki u ji ki sak wun di nammi, kimaan u din tiin niib nba teen punpotu yada nae. ¹³ Li paak, ki Juu leeb na mun piin tuun jaḡmaantoona, ki waa Piita nba tun linba maḡ, ki Banabas mōḡ mun ḡmat waa bi jaḡmaantoona maḡ. ¹⁴ Maa din la ki bi ki tōk barḡanii sōnu maḡ fanu yoo

nba, ki n bet Piita bi kur numm ni maa, “A tee Juu nirɔe, ŋaan a binberŋ tee nan wunba ki tee Juu nirɔ nae, ki bee ki a mukisib a bii tee nan Juu teeb na?”

Niib yada paake ki bi saa tinn

¹⁵ Tɔn, ti tee Juu teeb matiie, ti ki tee niboorganu nba ki bi yib biitdamm na kaa, ¹⁶ ŋaan ti mi nan see ki nirɔ n teen Yiisa Masia yada, ŋanne saa te ki Yennu n yet a u tee niŋano u boor; li ki tee taa tuun sennu nba yaa tii tuun linba kaa; li paak, ti mɔŋ mun teen Yiisa Masia yada a Yennu n yet a ti tee niŋamm u boor, yada maŋ paake, ŋaan li ki tee sennu toona tumu paak kaa. Kimaan Yennu kan yet a sɔɔ tee niŋano u boor, sennu maŋ toona tumu paaki. ¹⁷ Li-i tee taa yiab a Yennu n yet a ti tee niŋamm u boor Masia paak na, ŋaan ti lek bia tee biitdamm Juu teeb boor, nan binba ki tee Juu teeb na, linba na want nan Masia-e te ki ti tee biit damm amii? Aaii, li ki want nna kaa. ¹⁸ Kimaan mi-i jinji piin ki sent sennu nba ki n din biira naie, ŋann want nan n mɔŋ tee sennu maŋ biirtɔɔe na. ¹⁹ ŋaan sennu na paak ki n kpo sennu maŋ boor, a mii mɔk manfoor Yennu boor. Li tee nan bi din taan kpaa min nan Masia dapunpunn paake na. ²⁰ Li paak, li ji ki tee min nba fo na kaa, ŋaan li tee Masia nba fo ki be n ni nae. Mɔtana, maa mɔk manfoor ki be n gbanant ni na, n teen Yennu Bija Masia-e yada, li paake ki n be; ŋɔɔe loonin ki din gaar n paak ki kpo. ²¹ N ki yêt Yennu ninbatinu na; li-i tee ki Yennu bo saa yet a nirɔ nba sak sennu nae

tee niḡaṅo u boor, li want nan Masia kuun maḡ tee yanne.

3

Yada nba gar sennu bianḡinba

¹ Yimm Galasia teeb, bonjata na! Yimm nba poḡ mi Yiisa Masia dapunpunn paak kuun po nyik nyik na, ḡmee tan kpannini? ² Ii betin bonyennkoo man, yaa din tuun sennu na toona paake ki i gaar Yennu Seyeen amii yaa din gbat barḡanii na ki teen yada na paake? ³ I ki mək yame-e? I din piin Masiaweiu nan Yennu Seyeen paḡe; bee ki i ji loon yin gbenn nan i moḡ paḡi? ⁴ Yaa din la Yennu yaarlituk toona nba na kura kaa nyoot nan waama i boori-i? N dakin li mək nyoot. ⁵ Yaa din tuun sennu toona na paake ki Yennu turi Seyeen, ki tuun yaarlituk toona i sinsuuk ni amii yaa gbat barḡanii ki teen yada na paake?

⁶ Li sob Yennu gbouḡ ni a “Abraham din teen Yennu yadae, ki u yada maḡ paak ki Yennu jiiu ki u tee niḡaṅo u tooṅn.” ⁷ ḡanne want nan niib nba teen Yiisa yada nae tee Abraham yaaboona. ⁸ Ki li bia sob Yennu gbouḡ ni a ḡoo Yennu din poḡ mi nan u tan saa yet a binba ki tee Juu teeb mun tee niḡamm u boor, bi yada paak. ḡann paake ki u poḡ din yet Abraham barḡanii maḡ a: “A paake ki n tan saa teen piisin booru kur paak.” ⁹ Li paak, Yennu tee piisin binba teeno yada na paak, nan waa din teen piisin Abraham nba teeno yada na paak nae.

¹⁰ Binba waa sennu ki dukii a sennu na saa tinnib na, Yennu mɔtomm be bi paak, kimaan li sob Yennu gbouŋ ni a “Wunba ki waa sennu nba sob gbouŋ ni na kur, Yennu mɔtomm be u paak.”

¹¹ Nanne want fanu nan sennu dianu kan fit te ki niro-ii tee niŋaŋo Yennu boori, kimaan li sob Yennu gbouŋ ni a “Wunba teen Yennu yada, ki Yennu yet a u tee niŋaŋo u boor, li yoo yada paak, u sii mɔk manfoor nba kaa gbennu.” ¹² Nnaan sennu dianu nan yada teenu bokita; kimaan li sob Yennu gbouŋ ni a “Daano nba waa sennu na fanu, u sii mɔk manfoor.”

¹³ Nnaan ti din be Yennu mɔtomm nie, kimaan ti din ki fit wei sennu maŋ fanu, nnaan Masia tioŋo din gaar ti paak, ki be mɔtomm maŋ ni ki nyinnit li mɔtomm ni, kimaan li sob Yennu gbouŋ ni a “Wunba ki bi kpaau dapunpunn paak, Yennu mɔtomm be u paak.” ¹⁴ Yiisa Masia din tun linba na a ŋoo yaa paak ki binba ki tee Juu teeb n mun la piisin nba ki Yennu teen Abraham paak na; a ti-i teen yada, tin gaar Seyeeŋ nba ki Yennu din senn mɔsonn a u saa turit na.

Sennu nan mɔsonn na labaar

¹⁵ N naa waas, nnaant ki n jii nisaarik nan u loo binberŋ ki bikin, ki yin bann linba ki n beeri na paak: niib banlee-i sak ki lor lor a bin tun siar, ki sob bi sana, bi yeno ji kan fit nyi u loo na poor nan waama. ¹⁶ Yennu nba din tur Abraham nan u yaaboonn u mɔsona maŋ yoo nba, u din ki yet a “A yaaboona” kaa, nnaan u din yet a “A yaaboonn” yeno koo, wunba tee Masia na. ¹⁷ Maa want linba tee nnae: Yennu din senn mɔsonjaann; ki sennu nba din tan baar bina kobii nanna nan piintaa

poorpo na kan fit kpeen Yennu mɔsonn maŋi. ¹⁸ Kimaan li-i tee sennu dianu paakie ki Yennu teen niib u piinii, ŋann li wann nan u bo kan tur sɔɔ piinii u mɔsonn na paak; ŋaan li din tee Yennu mɔsonn na paake ki u tur Abraham u piinii maŋ.

¹⁹ Ki sennu na nyɔɔt tee bee? Toonbiit paake ki Yennu din tur nisaarii sennu na ki pukin u mɔsonn na paak, ki loon sennu maŋ-ii diab mɔkmɔk nan yoo nba ki Abraham yaaboonn nba ki ŋɔɔ Yennu senn mɔsonn ki turo na tan saa baar. Ki malakanba jii sennu maŋ ki teen nisaarik nuu ni a wuu tee sɔkintɔɔ, ²⁰ ŋaan Yennu tiɔŋo din tur Abraham u mɔsonn maŋ, li din ki tee sɔkintɔɔ kaa turo.

Sennu na nyɔɔt labaar

²¹ Tɔn, li want nan sennu na kɔn nan Yennu mɔsonae-e? Aaii, li ki want nna kaa; ŋaan Yennu-i bonni senn sennu nba saa fit tur niro manfoor, u bo saa yet a niib tee niŋamm u boor, sennu maŋ weiu paake. ²² ŋaan li sɔb Yennu gbouŋ ni a sɔɔ kur mɔk biit, a Yennu n tur binba teen Yiisa Masia yada na piinii nba ki u din senn mɔsonn a u saa turib na; bi yada maŋ paake ki u saa turib.

²³ Sennu na din tuu diat nan ti be dansarii ni nae, ki tan baar yoo nba ki Yennu fiit yada teenu labaar ki wannit. ²⁴ Li paak, sennu na din ŋman ti yomdaance ki diat mɔkmɔk nan yoo nba ki Masia tan baar, a tin teenɔ yada, ki Yennu n yet a ti tee niŋamm u boor. ²⁵ ŋaan mɔtana ti teen Masia yadawa; li paak, sennu na ji ki tee ti yomdaano.

²⁶ Yaa teen Yiisa Masia yada ki be u ni na, li paake ki i tee Yennu waas. ²⁷ Yimm nba ki bi din wuri Yennu nyunwuru, Masia sann ni na, yimme gaar u mɔŋ binbeŋ. ²⁸ Li paak, bɔkitu ji ki be binba tee Juu teeb nan binba ki tee Juu teeb sinsuuk ni, li bia ki be binba tee daaba nan yent-n-mɔŋ damm sinsuuk ni, li ki be poob nan jab sinsuuk ni; yaa be Yiisa Masia ni na paake ki i kura taan tee yenɔkɔɔ. ²⁹ Ki yi-i tee Masia yabie, ŋann i tee Abraham yaaboonae, ki tan saa gaar piinii nba ki Yennu din senn mɔsonn a u saa turo na.

4

¹ Tɔn, n bia ŋamii yeen a ŋaak bik nba lek tuu yaa wun tan di u baa faar na, ŋaan yoo nba ki u daa tee bonbunn na, bi tuu diau nan daabir nae. ² Yoo nba ki u tee bonbunn na, nisiabe tuu diau ki wubiiɔ mɔkmɔk nan waa tan saa beer jɔɔ, ki jaŋ yoo nba ki u baa senn na. ³ Ti mun tee nnae; yoo nba ki ti din ki mi Yiisa na ti din tee nan bonbuna nae, ki durinya ni na seek paŋ din diat. ⁴ Ŋaan yoo nba din tan jaŋ na, ki Yennu tun u mɔŋ Bija, ki poo marɔ, ki u sak Juu teeb sennu, ⁵ a wun tinn binba be sennu maŋ ni na, ki tin kpant Yennu waas. ⁶ Taa tee u waas na paake ki u tun u Bija maŋ Seyeen na ki u be ti para ni, ki ti yi ŋɔɔ Yennu a “N Baa, n Baa.” ⁷ Li paak, a ji ki tee daabir kaa, ŋaan a ji tee Yennu bike; ki faa tee u bik na paak, u saa tura linba kur ki u mɔk ki teen u waas nawa.

Pɔɔl baka nba be Galasia teeb ni bianjinba

⁸ Sianyoo i din tuu ki mi Yennu, li yoo i din tuu tee daaba ki tur linba set ki tee Yennu-e, ⁹ ŋaan mɔtana i bann Yennu-wa, ki Yennu mun mi-i, li ji teen nlee ki i loon yin ŋmat wei bona nba ki mɔk yiikoo nba saa sommi na? Bee teen ki i jin loon ki i kpant bi daaba? ¹⁰ I mantik ŋaan ki i baka be dagannkaa, nan ŋmaagannkaa nan sakgannkaa nan bingannkaa ni bonchiann, ¹¹ ki li te ki n mɔk jijeet i paak nan maa tun linba kur turi na biar yanna.

¹² N naa waas, n barimie, ii tee nan min na man, kimaan n mɔŋ mun ji tee nan yimm nae. I ki tun siar biirimi. ¹³ Maa din yiar na paake ki n sint mɔont barnanii na ki turi. ¹⁴ Li yoo maŋ n yiaru na din daamiwa, ŋaan i lek din ki yɛtimi; i din gaarin nan yaa bo saa gaar Yennu malaka bianjinba nae, ki bia gaarin nan yaa bo saa gaar Yiisa Masia bianjinba na. ¹⁵ I din mɔk parpeenn; ki bee teen ki i ji ki mɔki? N mɔŋ saa yet nan li-i diŋi bonni saa fit, i din bo saa sak ki nyinn i mɔŋ ninbina ki turima; ¹⁶ ki mɔtana, maa beeri barmonii na, n ji kpant i dataake-e?

¹⁷ Nisiab bikii a bi mɔk lomm bonchiann nani, ŋaan bi dudukit ki ŋani. Bi lorin a bin bokit min nan yimme, ki yin tunn kii waab. ¹⁸ Niro baka-i be sɔŋŋanu ni yoo saaka, li ŋan, mi-i lekii be i boor koo mi-i kaa. ¹⁹ N walonkai, li yiarin bonchiann i paak mɔkmɔk nan yoo nba ki Masia binbenj na tan saa gbee i ni. ²⁰ N yan ŋmat i paake. Ki n sunman ki n be i boor mɔtana ki lek ŋamm jii binbenj nba sɔ nani.

Bibuk nba jiin Hagar nan Sara po

²¹ Yimm nba loon ki sennu-ii dia-i na, i ki gbat sennu maŋ nba yet bianjinba-a? ²² Abraham din mək bonjai banlee; ki bi yeno naa tee daabir, ki loo naa mun tee pookuur poo.* ²³ Ki daabir na din mar u bonjak maŋ nan niib nba maar bianjinba nae, ŋaan ki pookuur poo na mar u bonjak na nan bianjinba ki Yennu din senn mɔsonn turɔ na. ²⁴ Bi poob banlee na see Yennu molora ŋanlee na seenu nie. Daabir maŋ sann din tee Hagar; ki u see molor nba ki Yennu senn Sainai jɔɔr paak na seenu ni, ki din mar u bik daabisin ni, ²⁵ kimaan Hagar see Sainai jɔɔr nba be Arabia tin ni na seenu nie, ki ŋman nan tingboun na ni Jerusalem na, ki ŋoo nan u waas tee daaba, ²⁶ ŋaan sanpaapo Jerusalem na tee yent-n-mɔŋ dooe, ki bia tee ti naa; ²⁷ kimaan li sob Yennu gboun ni a:

“Yimm pookanmata, ii mək parpeenn!

Yimm nba ki mi matyiaru tonu na, ii yiin parpeenn yanii man!

Kimaan poo nba be u kuukoo tan sii mək waas bonchiann

ki gar poo nba sɔɔ daa ki mi gɔrin ki nyikɔ.”

²⁸ Tɔn, n naa waas, timme mun tee Yennu mɔsonn waas nan Aisak nba din tee bianjinba na. ²⁹ Baa din mar bonjak nba nan niib nba maar bianjinba na din tuu mukis wunba ki bi din marɔ Seyeen yiikoo paak nae, ki li mun bia lek tee nnae nan mɔtana. ³⁰ ŋaan li sob nlee Yennu gboun ni? Li sob a “Berin poo nba tee daabir na nan u bija na, kimaan daabir bija na kan mi lakin di bi baa

* **4:22** 4.22 Sara-e din tee pookuur poo na.

faar nan pookuur bija na.” ³¹ N naa waas, maa yeen linba tee a ti ki tee poo nba tee daabir na waas kaa, n̄aan ti tee pookuur poo na waase.

5

Ki j̄in yent-n-m̄ɔŋ dianu po

¹ Yiisa Masia poŋ fat timma, ki ti be ti yamanie. Li paak, i daa te siar ji dia-i ki i tee li daaba.

² Min Pɔɔl m̄ɔŋe beeri a li-i tee ki i sak ki dia punpotu sennu na, li want nan Masia ki m̄ɔk nyɔsiat turini. ³ N n̄ammit beer daanɔ nba waa punpotu sɔnu nae, nan li kpaa talase ki wun wei sennu na kur. ⁴ Yimm nba yiab a Yennu n yet a i tee niŋamm u boor sennu weiu paak na, i poŋ b̄okit i m̄ɔŋ nan Masia, ki bia nyinn i m̄ɔŋ Yennu ninbatinu niwa. ⁵ N̄aan timm teen Masia-e yada, ki u Seyeeŋ mun be ti ni; li paak, ti m̄ɔk dindann ki guu yoo nba ki Yennu saa yet a ti tee niŋamme u boor. ⁶ Kimaan ti-i be Yiisa Masia ni, ti-i lekii pot ti puna amii ti-i kii poti, li ki kpaa talasi. Ti-i teen Yiisa Masia yada ki loon leeb, n̄anne tee linba kpaa talas.

⁷ Yaa din tuun fanu na, n̄mee tan te ki i nyik barm̄onii maŋ weiu? ⁸ Yennu nba ganni na kaa tun linba na. ⁹ Bi tuu yeen a “Datiŋ waaminnae te ki boroboro yon kur fuutir piir.” ¹⁰ Tɔn, ti Yomdaanɔ paak, n bia m̄ɔk yada a i sii m̄ɔk dudukyenn nanin; ki li-i tee niro nbae n̄mat i dudukit, Yennu saa dat daanɔ maŋ tubira.

¹¹ N naa waas, mi-i biaki m̄ɔontir a niib-ii porii bi puna gbaa, bee ki bi bia mukisimi? Li-i bonni tee barm̄oniie ki n m̄ɔontir punpotu po nan maa

mooontir dapunpunn po na, nann li bo kii mok mukisuku. ¹² Min bo sunman ki binba nmat i dudukit na n nyik punpotue, nnaan too bi moŋ.

¹³ N naa waas, Yennu yiini yent-n-moŋ nie, nnaan i daa te ki i yent-n-moŋ maŋ n tan te ki i gbanant niŋ n nyannini. Nnaan yimm n jii lomm ki somm i leeb man. ¹⁴ Kimaan sennu maŋ yur yet a “Ii loon a loo nan faa loon a moŋ bianjinba na.” ¹⁵ Nnaan li-i tee ki i tee i leeb dani ki biir i leeb nan muuk ni bonkobit na, i set saa biir i leeb ki gbenna.

Yennu Seyeen nan nisaarik binben labaar

¹⁶ Nnaan n beerie, nnaant ki Seyeen-ii dia i binben man, ki daa te ki i niŋ tuun nisaarik loommu. ¹⁷ Kimaan nisaarik loomm nan Seyeen maŋ loomm ki waa leeri. Loomm nba taar munlee na tee dataie nan leeb i ni; li paak, i ki tuun yaa loon linba. ¹⁸ Li-i tee ki i saak ki Yennu Seyeen nmakitiri, i ji ki be sennu na ni.

¹⁹ Nisaarik binben nba want li moŋ linba ni tee bonchonchonsime, nan jakint toona, nan lammeeuk, ²⁰ nan patmannu, nan nyokdinu, nan dataar, nan kunkona, nan funfunbiiuk, nan wutoor, nan bokitu, nan lukitin, ²¹ nan punponn, nan dayibu, nan lor yoona, ki bia jii bonlia nba naan nna ki pukin. N beeri nan maa poŋ beti bianjinba na, binba tuun linba na kan mi too Yennu naan ni.

²² Nnaan Yennu Seyeen te ki niro mok lomm, nan parpeenn, nan parmaasir, nan sukuru, nan burchint, nan namm, nan binbenŋaŋ, ²³ nan sikin-n-moŋ, nan moŋdianu. Sennsau ji kaa ki

saa biir wunba diari. ²⁴ Ki Yiisa Masia nba yen binba na narin pon kpil bi nisaarik binben nan li loonbiit kura. ²⁵ Yennu Seyeen nba turit manfoor na, li kpaa talas ki wuu nmakitir ti binben. ²⁶ Li ki nan ki tii mok karinbaanii, koo tii fiint ti leeb wutoa, koo tii mok funfunbiit nan ti leebi.

6

Jiin i leeb jik-kpiata man

¹ N naa waas, li-i tee ki i la soo tun toonbiit, yimm nba be nan Yennu Seyeen na, li nan ki yin sommo nan lomm, sonii kur ni, ki wun namm set fanu, kii mi ki bikinu saa te ki i mun bot. ² Ii jii i leeb jik-kpiata man, ki gbeen Masia sennu. ³ Soo-i kii tee siar, naan bikii a u mun tee soo, u kpann u moje. ⁴ Li nan ki soo kur n bikin u moje binben, ki fit kii mok yuugontir u moje toonjana paak, ki daa bikii waa tun linba nan u loo toona, ⁵ kimaan li kpaa talase ki soo kur n tun u moje toona.

⁶ Niro nba ki bi wanto Yiisa Masia barjanii na, li nan ki li yoo n mun jii linba ki u mok kur ki chent nan u wantoo man.

⁷ I daa kpann i moje mani; soo kan fit kpann Yennu; nisaarik nba bur linba, nanne ki u kpan tan saa jaan. ⁸ Wunba bur u moje gbanant loomm, u tan saa jaan kuume, u gbanant loonbiit man paak; naan wunba bur Seyeen nba loon bianinba na, u tan saa jaan manfoor nba kaa gbennue, Seyeen man paak. ⁹ Li paak, ti daa bakit nan toonjana tumu mani, kimaan ti-i kii nyik toonjana, ti tan saa gaar li nyoot yoo nba

jaje. ¹⁰ Li paak, ti-i la yaak, tin tun linba ḡan ki tur soo kura; ḡaan mantik kii tuun kii teen binba teen Masia yada ki waau na.

Kpaanjoontik nan foontii

¹¹ Tɔn, ii la maa sob sobingbera nba na nan n moḡ nuu. ¹² Niib nba loon bin penn Juu teeb para na, ḡamme mukisi a yin pot i puna, ki Juu teeb maḡ daa dintib biak, Masia dapunpunn na paaki. ¹³ Binba porii bi puna na moḡ ki waa Yennu sennu, ḡaan bi loon ki yin pote ki bii mok japaat i punpotu maḡ paak; ¹⁴ ḡaan min ḡarin kan mi faa parbiir see ti Yomdaano Yiisa Masia dapunpunn na kuukoo paak; kimaan u dapunpunn maḡ paake ki n kpai tingbouḡ na niḡḡ n gbanant ni, ki tingbouḡ na niḡḡ mun nyii n gbanant ni. ¹⁵ Bokitu kaa wunba pot nan wunba ki pot sinsuuk ni. Linba ji kpaa talas tee binbenpaḡ nba ki Yennu turit nae. ¹⁶ Parmaasir nan ninbatinu-ii be binba kur waa wannu nba na paak; bi tee Yennu niibe.

¹⁷ Ii mi man ki soo n ji turin daamii, kimaan n poḡ mok biak dokit n gbanant paak, ki li want nan n tee Yiisa daabire.

¹⁸ N naa waas, ti Yomdaano Yiisa Masia ninkpabaḡ-ii be nani. Mamomm.

Yennu Gbouj Moor
Bimoba: Yennu Gbouj Moor Bible

copyright © 2003 Wycliffe Bible Translators, Inc.

Language: Bimoba

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 29 Sep 2022 from source
files dated 11 Jul 2022

00d89ba0-4677-52d9-9bc5-aa3d7c5c966d